

Figuranan conoci den historia:

Julio Maduro

E biaha aki nos no ta bai otro pais, nos ta keda riba nos mesun isla y no ta bai mucho den pasado, sino djies algun aña atras pa conta bosu tocante un conocedor di historia di Aruba, esta **Julio Maduro**.

Julio a nace dia 12 di April 1924 na Watapana Gezaag, San Nicolas, unda su mayornan tabata tin un tienda na principio di siglo pasá. Famia Maduro tabata tin cunucu y plantacion di aloe tambe. E tempo ey nan tabata manda nan mercancia cu barco di bela pa Playa, e.o. aloe, boonchi watapana, palo, pampuna, patia y sombre gevelecht. Na Playa nan tabata cumpra otro mercancia pa nan tienda na San Nicolas, manera sucu, hariña, herment, paña y tela. Famia Maduro tabata benche te hasta cah'i morto.

Cu yegada di Lago tur cos a cambia. Lago a bin cu su mes "comisario" y na 1937 famia Maduro a sera su negoshi. Como hoben Julio mester a yuda corta y drenta aloe tur mainta di 5'or y mei te cu 10'or y mei. Un trabao pisá cu ta laga hende tur sushi. Cu 20 aña Julio a cuminsa traha na Lago. Pero despues cos a bira malo y pa cubri gastonan Julio a bai navega riba un tankero. Despues cu el a bolbe Aruba, el a bai traha na Sociale Zaken y asina Julio a drenta arena politico.

Na 1955 el a wordo eligi pa forma parti di Bestuurscollege. Julio tabata tin 31 aña só tempo cu el a bira diputado.


Julio Maduro tabata tin un "don" especial. E tabata scirbi poesia y storianan cortico. Tur tin di haber cu cultura di Aruba. E tabata lucha pa nos idioma papiamento y tabata tin un amor grandi pa su isla, su hendenan y su naturalesa.

Esaki el a demonstra den su poesíanan "Luto" y "Pakiko mi ta Arubiano". E tabata miembro di Comisión di bandera y di Stinapa (despues Fanapa y Stimaruba). Pa esakinan el a duna hopi lectura na scolnan y organizacionnan.

Julio semper tabata cla pa yuda cu informacion tocante historia, flora y fauna di Aruba. Asina e tabata presentá un programa na television masha gustá anto

gratuitamente. Casi henter Aruba tabata sintonizá e programa "Aruba y su pasado". Su sponsor tabata asina satisfecho cu e trabao di Julio cu el a regalé un camera di video.

Julio a colaborá cu



Esaki ta Julio Maduro, un conocedor di historia y cultura di Aruba.

varios publicación e.o.: Encyclopedie van de Nederlandse Antillen, bukinan di Aruba, diferente corant y revista y varios mas. Matinette como programa di television y como revista (despues Chabalito) tambe a haya hopi colaboracion di Julio Maduro riba topiconan di Aruba. Te hasta Julio a traha un poesia - cu nos ta publicá aki bao - especial pa un declamador infantil recitá na Tele-Aruba den Matinette na aña 1978.

Julio Maduro, despues di un enfermedad cortico, a fayece dia 3 di mei 1993, lagando atras su esposa, y 8 yiu.

Awor cu e no ta cu nos mas, toch su yudanza a keda den forma di copianan cu e mes a laga y autorizá nos pa sigui usa, con tal cu ta pa yuda mantene historia y cultura di Aruba bibo cerca e generacionnan cu ta sigui.

PASITO, PASITO
scirbi pa: Julio Maduro

Pasito, pasito, bo ta core
Pasito, pasito, bo ta salta
y bo curpa chikito
ta move, hunto cu e
yangá di bo nanishi.

Bo rabo, apenas un cabito
cu dos horea di pastechi
y bo wowonan grandi
bunita, cu parce kiniki
ta pas cu bo cuero shinishi.

Pasito, pasito, bo ta move
pasito, pasito, bo ta salta
Pero si pasa un cachó
anto si lo bo bula
core, salta y sigui core!!!!



WISE

SABROSO

te cu Bo lo

pidi mas!



Arendstraat 111, Eagle
Tel.: 822269. Fax: 825154

Design & Artwork: Sea Graphics

lucido



Chabalito

Number 5 - Año VI - Afl. 2,=



BIBLIOTECA NACIONAL ARUBA



3 0993 00185 643 4

ICH - FEB '04